

COMUNICATO n. 748 del 09/04/2024

Traduzione in ladino

Col avis “Coabitazione attiva”: cèsa (per 100 euro al meis) e lurier per ot joegn

[Ladino] L avis l vel didèr i joegn a se n jir de cèsa e arjonjer sia indipendenza. La pruma edizion la vegn endrezèda tel comun de Scurelle. L projet l à l zil de ge dèr l met a ot joegn de jir a stèr 24 meisc alalongia te n cartier e paèr n fit de presciapech 100 euro al meis. Estra apede, de gra a la colaborazion co l’Agenzia del lurier, se podarà fèr acioche domana e perferida les se troe più sorì, coscita che la capacitèdes di joegn posse ge dèr na responeta a la domanes del marcià del lurier dal post. En curt, co la sperimentazion “Coabitazione attiva” l ent provinzièl l vel didèr fora i joegn, anter i 18 e i 35 egn che per rejons sozio-economiche o culturèles i stenta a se n jir de cèsa, a fèr la transizion envers l’età madura.

L termin per se enscinuèr a l’avis l é stat sburlà ai 30 de oril del 2024.

“Veste te n jir de cèsa e esser independent, e paèr 100 euro al meis de fit? E ence troèr n lurier? No l é n ensomech, l é realtà! Tol pèrt al avis “Coabitazione giovani” e dage sbunf a tie davegnir!”. Chesta la paroles de la reclam del projet che vegn metù a jir a Scurelle. L’avis l va fora ai 30 de oril del 2024.

L projet l perviet n cartier con set cambres con sie bagn e spazies a la leta de duc, de proprietà del Comun de Scurelle, che l ge vegn dat en conzescion per la doura debant a l’Azienda Publica per i Servijes a la Persona de Borgo Valsugana. L’Apsp l’à dezedù de l meter a la leta per n percors inovatif che l fae crescer la comunanza e l’economia dal post, aldò del prinzipie de l’economia de la saturazion, che fossa ge dèr na neva vita ai fabricac publics no desfruté. L endrez del projet Coabitazione l é de: l’Agenzia per la coesion socièla, l’Agenzia del lurier de la Provincia Autonoma de Trent, l Comun de Scurelle e l’Azienda Publica per i Servijes a la Persona de Borgo Valsugana.

L Projet l à l zil de didèr i joegn acioche i sie più indipendenc, ma ence de renforzèr la sozietà locala, con chela de miorèr l bonstèr de la comunanza e fèr acioche l paisc sie più atratif. Na particolarità de “Coabitazione” l é che chi che tol pèrt à da fèr n pecie de ore de volontariat, aldò del sentiment de zitadinanza ativa, valor fundamentèl per l Trentin. L avis l perveit diesc ores al meis de volontariat atif. I joegn che tol pèrt i cognarà se dèr ju per la comunanza e didèr te chela ativitèdes che ge dèsc benesser a duc.

N auter ambit che vegn tout ite con chest projet, estra che dèr l met de aer na cèsa a n priesc bas, l é chel del mond del lurier, de gra a n lurier dessema co l’Agenzia del lurier, che l dèsc l met de envièr via percorsc de autonomia essenzièl dal pont de veduda profescionèl, estra che economiche e sozièl.

DUTA LA INFORMAZIONI:

Telefon 0461/754123

e-mail info@apspborgo.it

www.trentinofamiglia.it

Traduzion di Servijes Linguistics e Culturèi del Comun general de Fascia

(cdt)